

東
華
續
錄

東華續錄

咸豐三十四

臣王先謙敬編

臣陶濬宣恭校

夏四月己巳朔享太廟○諭軍機大臣等據勝保奏追剿臨清竄匪續獲勝仗一摺逆匪由臨清南竄占踞李官莊經勝保等督兵斬殺尙有一二萬之多若不趕緊殲除又必致負隅抗拒昨有旨諭令僧格林沁確探嚴防並飭令迅撥馬隊馳赴勝保軍營協剿本日據奏已挑選精捷馬隊八百名俟穆輅帶兵來營卽飭明慶帶領馳赴勝保軍營穆輅之兵何以尙未趕到著卽派員一面催提一面飭令馬隊官兵兼程前進李官莊追剿喫緊該大臣自必統籌全局以期無誤事機據勝保奏生擒賊匪供稱該逆本欲犯大名東昌因畏官兵緊追不敢肆志前進且謀屯聚村莊再想

竄路等語李官莊與東昌大名等處俱有大路可通該逆詭譎異常難保不繞越思竄該大臣仍當確探賊蹤妥籌防範至阜城之賊仍前死守何日始能蕝事玉明等所送礮位早到軍營又將何所藉口本日奏報抽撥馬隊等語於賊匪見在情形該大臣如何布置設法乘機攻取並未敘及朕宵旰焦勞日盼捷音早至乃一味遷延不能迅奏膚功朕於該大臣倚任不爲不專恩遇不爲不厚若頓兵日久師老無功該大臣尙有何顏對朕耶著僧格林沁督飭將弁兵勇剋期將此股賊匪一鼓殲除毋畱餘孽並著與勝保桂良載齡等隨時知照毋稍疏虞將此由六百里加緊諭知僧格林沁並諭西凌阿托明阿知之○諭勝保等奏餘匪潰竄官兵追剿情形一摺二十六日我兵攻克臨清州城餘匪向南奔竄雖經勝保等督兵追剿殲斃多名而逆眾尙有一二萬之多全股盤

無多故敢於東北西北兩路肆行奔突曾國藩因岳州失利退保
長沙見已諭令仍督舟師自岳州赴援南昌協副將羅玉斌所帶
兵勇復諭陳啟邁飭令由麻城黃安一帶直赴台湧軍營但此兩
路官兵趕到尙需時日恐難濟急松潘建昌兩鎮官兵亦未據奏
啟程本日又嚴諭裕瑞飛催前進矣舒倫保已於上月二十四日
啟程計日當可到關總兵柏山相距甚近何以尙未趕到著卽飛
速迎提合力進擊毋任藉詞延宕該督所調武勝關黃土關陝甘
兵共一千名加以柏山所帶官兵約有二千餘名務當激勵將士
設法相機進攻力遏賊匪北竄斷不可令其沾染楚兵恇怯習氣
致誤事機其荊襄一帶仍須與官文等聲息相通互爲策應所需
軍餉已諭令裕瑞王慶雲曾國藩設法接濟本日據官文等奏添
派官兵防堵懇酌撥銀兩等語該將軍見添派防兵一千二百餘

名口糧不敷支放自係實在情形著台湧知照官文等准其於四川解楚餉銀內酌量截畱以濟要需惟不得全數畱用致台湧軍營益形支絀也將此由六百里加緊諭令知之○辛未諭軍機大臣等琦善奏水陸兩路獲勝情形一摺此次艇船由焦山上駛連日接仗雖經擊沈賊船多隻轟斃逆匪多名仍未敢痛加剿洗進攻陸路賊匪亦屬小有斬獲該逆蟻聚瓜州屢誘不出一遇官軍進仗輒復退回死守似此狡猾詭譎若再令其負隅抗拒剿辦何日蕙事琦善督師日久朕之倚任不爲不專著卽嚴飭統帶水師鎮將迅速管領各項艇船設法駛進瓜州併力環攻與陸路官兵會合夾擊毋得藉口火藥缺乏再事遷延若能剋日將該處餘匪掃數殲滅則該逆雖有復取揚州之說亦將何計可施該大臣惟當力圖攻取以期爲防無待朕之諄諄訓諭至由皖北竄之賊眾

至數萬直犯臨清經勝保等疊次截殺克復州城仍有一二萬賊
竄踞李官莊地方且阜城餘匪亦未能一律肅清畿輔情形萬分
喫緊而皖省分踞廬州安慶各匪負固如常上竄湖北逆眾久踞
漢陽漢口復由雲夢孝感疊陷德安應山進逼隨州其由金口分
竄之賊又掇及楚南再陷岳郡各路賊情披猖至此朕听夕焦急
寢食難安琦善應如何通籌全局爲朕分憂叢爾瓜州攻剿如此
費手亦豈不知滅一股卽少一股庶可分兵策應爲漸次廓清東
南之計耶將此由六百里加緊諭令知之○諭昨據台湧奏催調
黃土關陝甘官兵已有旨諭令英桂迅飭帶兵各員出境赴援乃
本日據英桂奏報竟有飛咨台湧暫緩調撤武勝關黃土關守兵
之語何昏憤若是調兵進剿豈得謂之調撤前次諭令該撫挑選
精兵星夜前進並催總兵柏山星馳赴援原令其出境迎剿該撫

乃以遵旨嚴防交界要隘爲詞並欲俟舒倫保柏山抵信陽後畱兵駐關方可前進似此必致兩處貽誤著英桂鄭敦謹仍遵前旨飭令武勝黃土兩關陝甘官兵剋日前進總兵柏山亦當兼程前進台湧見駐應山縣境之東旺店距豫省較近所有調到豫省之兵卽著台湧相機督率進剿此時賊勢狃固不可孟浪輕進亦豈可任賊北竄毫無布置其舒倫保赴援之兵卽係柏山之後路仍著英桂沿途飛催並飭經過地方妥爲應付總期兵力厚集以剿爲防朕所以屢催豫兵赴楚者正爲嚴遏前路卽以固豫省藩籬該撫所奏何以尙未深悉朕意耶另摺奏陳州剿捕喫緊請畱牛鑑暫緩赴潁等語見在皖豫交界情形較楚豫交界地方稍有不同著准其暫畱陳州督辦土匪若潁州一帶有警仍應出境會剿不得區分畛域致誤事機皖楚兩省軍情仍著英桂隨時確探

速奏將此由六百里加緊諭知英桂並諭鄭敦謹知之○壬申諭
內閣朕寅承大寶時以法祖爲念去歲冬至南郊大祀未克
躬親今正祈穀又酌減儀文雖因骸疾未愈升降恐致失儀然
慚愧榮衷實有不能以言喻者茲逢雩祭屆期幸賴天恩朕
躬步履如常一切典禮仍應照舊舉行因思至敬無文禮昭明訓
前期詣壇祇謁暨恭視壇位典禮允宜遵循勿替益申儆恪
之誠其閱視遵豆牲隻非闕大典嗣後仍遣員閱視勿庸雙請祭
日禮成後仍在降輿處乘禮轎出廣利門永爲例○諭壇廟
大祀鉅典攸關所有王公以下及文武百官例應陪祀人員均應
恪恭將事以昭誠敬乃近日陪祀各官人數無多總因視稽查爲
具文怠惰偷安罔知敬畏著再行申諭宗人府禮部都察院各堂
官嗣後凡恭遇壇廟祭祀其應行陪祀人員如有無故不到

者卽著名該衙門指名查參以重祀典○諭勝保奏逆匪南竄追殺獲勝一摺臨清潰竄餘匪自經官兵屢次痛剿伏匿李官莊經勝保等四面圍攻該逆情急急圖潛逃於三月二十八日黎明全股向西南衝出我兵分兩翼追殺逆眾且戰且走德勒克色楞魁福綿洵克興阿急督馬隊進剿勝保自帶馬隊遏其旁竄之路該逆自知難脫抵死回拒我兵益加奮勇槍箭刀矛同時並進追殺三十餘里沿途斃賊二千餘名半係長髮真賊餘匪竄至冠縣迤北清水集占踞村莊三處善祿督帶步隊登時趕到縱火焚燒斃賊五六百名立將三村奪回統計是日殺賊二千數百名生擒二百餘名解散及投出裹脅之眾不下二三千人奪獲大礮十二尊槍械旗幟牛馬車輛火藥無數此次逆匪奔竄占踞清水集地方復經我兵痛剿已屬殘喘苟延著勝保督飭官兵盡力圍剿務令

就地埽除毋任再有竄逸○僧格林沁等奏該逆自三月二十三
日經臣設法誘其離巢殄斃多名後死守不出數日以來用礮轟
打遙見賊踞村莊煙土飛揚坍塌屋宇甚多斃賊不少惟該逆刻
刻思竄四月初一日丑刻該逆攻撲南面壕牆挖拉樹柵經副都
統那敷德侍衛那爾松阿參領永奎督飭官兵開放槍礮侍衛綢
闊亦督兵協同轟擊該逆仍拌死撲近壕邊我兵槍礮齊施斃賊
無算該逆退出樹柵復撲向侍郎培成營壘走入大道踏遇地雷
登時煙火衝天雷聲震地轟斃不知其數初二日子刻該逆又撲
向北面臣托明阿督率已革總兵德坤等帶兵極力抵禦臣僧格
林沁聞報卽派侍衛達崇阿副都統郭什訥等帶領馬步各隊截
剿賊用噴筒火罐向我兵拋擲拌命攻撲適德勒克桑布帶領卓
索圖盟官兵從旁攻擊該逆力不能支踉蹌敗退回巢斃匪不下

數百名

臣

等惟有嚴飭各營帶兵官員仍妥爲防範不得稍有疏

虞

上諭軍機大臣等此次逆匪由阜城南面撲出被地雷轟擊

殲斃甚多復向北面衝突又經官兵擊退回巢逆勢窮蹙急圖竄
逸該大臣已四面安設地雷正當乘此機會誘令出巢悉數殲除
惟該逆詭計百出一經受創地雷處所設法揭破不可不防該大
臣務卽懷遵疊次諭旨迅督各路官兵將此股賊匪盡行掃蕩收
復阜城毋令竄出致與東境賊匪會合本日勝保奏二十七八等
日將李官莊賊匪痛剿沿途擊殺五六千名追至距冠縣四十里
之清水集該逆占踞三村立即奪回復又焚斃多名賊匪見在屯
聚清水集必須併力圍攻而德勒克色楞額受槍傷甚重不能督
帶馬隊平海亦項受槍傷計該逆所最畏憚者馬隊官兵當此得
力之時無人管帶且不敷追剿著僧格林沁於接奉此旨後卽日

飭令明慶將挑選精銳馬隊官兵八百名統帶啟程前赴勝保軍營隨同剿辦勿庸俟穆輅到營再行換撥轉致遲誤該大臣卽將明慶啟程日期馳奏穆輅自桂良奏參後不知行抵何處殊堪詫異著僧格林沁迅速檄提仍一面查明如有沿途逗遛情節據實嚴參從重治罪將此由六百里加緊諭令知之○諭勝保等馳奏官兵截剿竄匪大獲勝仗一摺此次逆賊被剿窮蹙向南奔竄經勝保等督兵分路截殺追剿擒斬約有五六千人辦理尙屬得手惟該逆被創情急見復竄踞清水集地方南距冠縣僅四十里若剿辦稍遺餘力又必致負隅拒守以老我師且壤地緊接大名此時自以嚴扼西北兩面爲緊要斷不可任令逆蹤肆意奔突仍復擾及畿疆卽東南一路亦須周密布置盡力追擊總期就地芟除迅籌妥辦免致餘燼復熾所請添調馬隊本日復諭令僧格林沁

迅卽飭明慶統帶前次選出精銳八百名剋日啟程卽著勝保派員飛檄迎提以期迅速所有蘭儀及豐工各河口節經嚴諭各該督撫鎮道等多撥兵勇防守要隘該大臣仍當督率帶兵各員乘此股竄匪喘息未定一鼓作氣聚而殲旃方爲不負委任若再延時日又致該逆竄擾他處但以追勦獲勝爲詞而不計南北大局貽誤之罪更將誰諉德勒克色楞忠勇之忱朕所深悉疊次勦賊獲勝均能奮不顧身尤堪嘉尙此次親督馬隊進勦於黑夜之中被賊槍打穿左脅血透重衣覽奏之餘實深懸繫已明降諭旨加恩賞賚並特派乾清門侍衛恩全前往看視用示恩眷仍著勝保先行傳旨嘉慰令其一面加意調攝俾得及早就痊與勝保等同心勦力殄此妖氛朕方懸不次之賞爲該大臣等褒獎勸勞也仍著勝保將德勒克色楞及總管平海受傷輕重情形隨時馳奏以

慰朕懷至賊匪自竄入山東境內連陷州縣地方文武總未能實力堵截卽如李官莊賊竄過後其木壘壕牆地方官仍令畱存並不平毀可見平日團練防守盡屬空談見在賊匪被勦又將同甯冠縣或東西分竄著勝保傳旨崇恩厲恩官嚴飭地方文武員弁激勵兵勇四面堵擊以助官軍追勦若守土之官漫無布置仍前貽誤卽著該大臣指名嚴參以肅軍律將此由六百里加緊諭知勝保並諭德勒克色楞善祿知之○兩江總督怡良奏庫款支絀請將本年大運絀段暫緩織辦得旨此項絀段實爲內務府必用之物並非可緩宮中每歲用度儘可節減惟外藩賞項所有實多見已屢將庫存別項抵用數次後必更無所出汝等外邊實不能深悉內府用度然藩庫無款亦係實情又不能暫行緩辦著設法變通先解一半或少半以濟急需○癸酉諭內閣太常寺奏遵旨

呈進 開帝廟圖式一摺 開帝顯佑我朝神威疊著上年加崇封號升入中祀一切典禮悉照中祀舉行前據太常寺奏請展拓廟制以示尊崇朕思致敬之道以實不以文 開帝廟崇奉有年若遽易舊規轉不足以妥神靈而昭誠敬所有廟宇規模著悉仍舊制無庸增拓樂器一切均照本年春季陳設至拜跪禮節僅行二跪六叩雖係照中祀例然滿洲舊俗於祭神時俱行九叩禮嗣後親詣致祭亦著定爲三跪九叩禮用伸儼恪之誠○予廣西陣亡知縣江載愔等祭葬世職○乙亥諭軍機大臣等本日玉明等同京呈遞阜城軍營形勢地圖朕詳加披覽布置尙爲周密賊匪自初一日被地雷轟敗初二日復因撲壕被剿之後連日作何情狀曾否出撲此時誘賊離巢痛加剿洗固爲要策但據玉明等面奏僧格林沁曾帶親兵數人輕騎誘賊爲賊匪大股鈔圍勢甚危

急大兵隨後趕到始獲全勝按之該大臣二十六日所發奏報情節適合該大臣因逆匪堅匿不出急欲圖功輕於一試固屬不得已之苦衷惟統帥爲一軍之主國體攸關非如偏裨將弁專以衝鋒陷陣爲功前此該大臣在王慶坨時輕騎前往天津朕卽有硃批詳示並非教以畏葸輕敵冒險究非統帥所宜該大臣務飭將士將阜城賊匪設計殄除於勇往之中仍寓持重之意庶免朕心懸繫至圖內所繪阜城東面紫有董占元營盤該革員前在懷慶打仗卽不甚得力數月以來直隸軍報從未敘及該革員隨同打仗究係何時畱於該大臣軍營是否尙堪驅策著卽認真察看毋稍遷就見在山東逆匪經勝保連日追殺竄往冠縣一帶本日據報所餘之賊不過數千冠縣與大名接壤已諭勝保嚴飭張殿元達年等實力堵剿防其西竄惟據擒獲生賊按出阜城逆匪書信

仍有催其迅速救援之語是阜城一日不淨賊心一日不死儻再有續來逆匪勢必又肆鴟張僧格林沁固不可恃勇輕進亦不可專恃長圍致延時日也將此由六百里加緊諭令知之○諭勝保奏追擊南奔逆匪大獲勝仗一摺並以營帳被焚請旨議處等語業於摺片內詳晰批示該大臣接奉後返躬自問當如何益加儆畏此次逆賊假冒官軍鄉勇焚燒帳房車輛並引然火藥何以事前毫無覺察如果步武嚴整奸細何由得入軍營重地又豈可以昏夜稍弛防閑乃致後隊官軍及隨營糧臺紛紛撤退想彼時擾亂情形幾欲貽誤大局焉知不由該大臣屢次戰勝心高意滿有此疏虞若僅將勝保桂明議處了事轉足以釋該大臣等疏失之愆而無以見朕諄諄訓誡速望成功之意且初二日追剿逆賊奪回各村亦尚勇往勝保等姑免置議著將南竄冠縣之餘賊六

七千名責令盡數殲擒該大臣既令魁福馳往截剿能否不令該逆占踞縣城何以既稱該逆不能再踞復稱如果踞守自當設法圍剿可見魁福之能繞出賊前與否該大臣尙無把握該處緊接大名果係縣城空虛逆賊無所繫戀尤防其西竄直境復爲北犯之計仍與阜城賊匪會合該大臣應卽飛飭張殿元等一面嚴守要隘一面督兵迎擊與大軍合力夾攻較易得手仍不得任令該逆肆意南奔一味尾追縱有斬擒而餘賊愈竄愈南官軍愈追愈遠北路之援應不靈南賊之勾結更易大勢轉爲牽掣何以迅就肅清本日已將阜城逆信中催令後隊渡黃等情傳諭百勝王夢齡嚴密防堵仍著該大臣速將冠縣境內逆匪剋日掃蕩淨盡朕方懸賞以待正不必先予議處也勉之懷之將此由六百里加緊諭令知之○勝保奏謝開復處分賞還花翎恩得旨功賞罪罰惟

汝等自取賞還頂翎不過策以將來破臨清時果能殲戮渠魁豈止開復而已也又奏賊竄冠縣追勦獲勝情形批朕猶慮其由東而北奔竄汝云按盡餘匪卽行追殺恐又係分股南奔以圖牽掣汝屢次報獲勝仗正在得手之際不可心高意滿允不准稍蹈欺飾不實之咎又奏賊燒帳房車輛請與桂明一併議處又批前隊有警後隊不但不救轉退至數十里之外各不相顧何怪乎總未成功著查明先退者正法數人以儆其餘汝從前軍法尙嚴何歷練日久頓改初心豈有所回護恐人挾制不敢振作耶朕非疑汝出此數語汝返躬自問有則速改○丙子僧格林沁等奏近日狂風大作塵沙飛揚臣等因恐出隊輕進致誤事機嚴飭各營不分晝夜巡守長圍以防潰突初四日夜該逆撲近濠邊我兵槍礮齊施追至埋有地雷處所被轟逃回初六日子刻該逆復趁風勢向

東南培成營盤舍命不突該處與烏凌額防所相連雖經培成烏凌額等極力抵禦竟被撲出重濠順風拋擲火彈噴筒將培成等營內帳房焚燒培成督兵奮擊未容竄潰臣一聞逆匪竄出立即催調各營馬隊趕至該處合力截殺我兵奮勇直前殲殄逆匪無數該逆退至濠邊死拒不回我兵總未容其突出此時惟有俟狂風暫息或可不至債事蔽此垂成之功設竟不能兜攔臣等立即前截後追亦不敢任其遠颺至培成等營盤失挫任賊突出雖由風勢太猛人力難施究屬堵守不力相應請旨將侍郎培成摘去頂帶責令立功以贖愆尤副都統烏凌額亦有應得之咎惟是日進攻頭受槍傷請從寬免議臣僧格林沁統率無方以致官兵營盤挫失應請一併議處上諭內閣阜城賊匪於初六日夜間乘風撲出重濠向培成等營盤拋擲火彈噴筒焚燒帳房雖經僧格

林沁催調各營馬隊合力截擊斃賊無數該匪死拒濠邊尙未竄出究屬防範不力培成著摘去頂帶烏凌額因擊賊受傷免其置議僧格林沁未能先事豫防著傳旨嚴行申飭仍著該大臣督飭各路官軍盡力圍剿務將此股逆匪悉數殲除毋任竄逸○諭軍機大臣等僧格林沁奏逆匪乘風撲過重濠見在力籌截剿一摺阜城軍營濠牆樹柵層層布置已有月餘之久何以逆匪撲出竟無攔阻致令焚燒營盤直抵濠外抗拒不回是連日安設長圍全不得力其防守官兵所司何事實堪痛恨今該逆死踞濠邊雖未全竄已在長圍之外防堵愈難且該逆屢出竄撲皆向東南一帶顯係欲從景州德州等處潰逸與南來之賊勾結見在臨清賊蹤雖已漸遠仍在冠縣境內距直隸大名甚近若任令向東南竄出由景州故城循運河而南便可合爲一股即使我軍能向東南力

截又恐大兵全聚一隅該逆窺我他處空虛陽撲東南潛向東西
北三面突圍衝撲處處皆可竄出尤爲可慮僧格林沁不能迅速
奏功此次失利轉以人力難施爲解看此光景直似束手無策若
不能將撲出之賊全數截回極力殲戮致令稍有疏虞朕自能將
僧格林沁從重治罪不僅以議處了事所稱前截後襲不任遠屢
等語亦係毫無把握之事總以就地殲滅爲要至此次撲出賊眾
是否係阜城內全股突出抑城關兩村仍有賊匪聚伏我兵以全
力扼其東南設該逆窺我空虛處所分股奔突轉致我兵疲於接
應又墮賊聲東擊西之計該大臣務當通籌布置毋稍大意將此
由六百里加緊諭令知之○丁丑諭軍機大臣等勝保等奏連日
督兵追剿賊匪一摺此股逆匪屢經我兵追擊所餘不過四五千
人其勢已極窮蹙惟由冠縣莘縣及陽穀一路竄赴梁山復由梁

山南竄賊勢剽疾異常必須乘其喘息未定奮力窮追尤應派員管帶馬隊設法繞出賊前兩路夾擊庶可聚而殲旃若徒事尾追轉恐該逆沿途裹脅逆賊復張或占踞村鎮又成負隅之勢剿辦終無了局著勝保卽督飭馬步各隊迅速追剿總期四面兜圍爲一鼓蕩平之計官兵追剿賊匪糧草必須先爲籌備馬步各兵晝夜奔逐又豈能枵腹荷戈該大臣務督飭糧臺各員隨地隨時廣爲豫備斷不准藉詞耽延致誤事機卽偶爾不能趕到於所過各處飭令地方官無論草豆米麪均可暫時接濟以利軍行逆匪由梁山南竄究竟欲往何處著該大臣迅卽確探賊蹤痛加剿洗勿畱餘孽至投誠裹脅之眾該大臣擇其有技勇者畱於軍營效力自爲解散賊勢起見然必須加意防範前次勝保及桂明營盤被焚安知不有此等奸匪內外勾結賊情詭詐異常務當慎密周防

不可因屢獲勝仗稍涉大意致有疏虞將此由六百里加緊諭令知之○戊寅諭軍機大臣等向榮奏節次籌攻金陵並請飭催楚粵礮船師船一摺向榮自前次奏調閩粵官兵後日久未據奏報軍情朕睠懷南服焦灼難名乃本日閱該大臣所奏仍不過敷衍塞責於攻剿各情毫無把握至余萬清進攻鎮江雖斃賊多名並未能卽時克復城池且總兵劉開泰等均各受傷官弁兵勇陣亡者亦復不少顯係我兵接仗失利尙欲設詞掩飾是誠何心向榮統領全軍攻剿金陵鎮江逆匪是其專責乃屯兵日久師老餉糜並不能出奇制勝埽穴擒渠似此觀望遷延自問當得何罪江南勦賊必須力扼長江爲水陸夾攻之計廣東所備船礮昨已諭令琦善派員迎提以爲攻剿瓜州之舉此項船隻專爲肅清江面而設該大臣與琦善雖分剿江南江北而所辦實係一事況江路一

通使南北之賊聲勢不能聯絡則該大臣等剿辦均可得手所有廣東各船並著向榮與琦善會商飛速分提以資攻剿本日據駱秉章等奏賊勢全注湖南曾國藩見仍在省城防剿是楚南情形此時頗爲喫緊湖南舟師一時不能駛赴下游該大臣惟當就見在兵勇並飛催前調之閩廣官兵迅速設法籌剿一面嚴飭余萬清督率弁兵剋日收復鎮江毋得株待湖南船礮致誤事機另片奏請飭和春帶兵馳赴山東與秦定三會剿等語自係因逆匪渡河肆擾恐廬州之匪牽掣我軍爲移緩就急之計惟皖省情形剿辦正當喫緊若必將和春調赴山東轉恐我兵一撤廬州之匪乘隙北竄不如仍令和春等遏賊北竄較有把握也將此由六百里加緊諭令知之○駱秉章曾國藩奏逆賊自二月由水路上竄湖南被兵勇擊退茲復糾集醜類水陸並進大舉南犯賊船數千號

分泊長沙之靖港湘陰之樟樹港等處距省城數十里陸路之賊由靖港取道甯鄉直趨湘潭臣等見派兵勇馳赴湘潭相機攻剿仍畱水路四營扼紮下游以遏其上竄之路 上諭賊匪前由湖北復擾岳州陸路官兵失利曾國藩遽率水勇礮船同省守禦疊次諭令與路秉章熟籌防剿相機進攻不得株守長沙原以楚北賊勢猖獗肅清江面專恃南省水軍茲據奏稱該逆水陸並進大舉南犯賊船數千號分泊靖港樟樹港等處距省數十里陸路之賊由靖港取道甯鄉直趨湘潭是該匪已繞越省城何以毫無阻隔曾國藩所帶礮船練勇甚多何以未經與賊接仗胡林翼塔齊布所帶各兵見在何處剿賊該撫前調江忠濟募勇赴援並添調辰州官兵計日約可到省且鎮筵鎮標兵丁素稱勁旅並辰沅道所轄屯兵亦可酌調來省著路秉章曾國藩卽就本省弁兵設法

布置迅速掃蕩南省賊氛至廣東兵勇調出甚多實屬難以再撥
貴州獨山州土匪見亦勾結粵匪滋事本省防剿緊要恐兵力亦
難再分總之上竄賊匪雖多大半裹脅之眾若能水陸兩路設計
夾攻殲厥渠魁餘匪自易剿辦紛紛徵調遠兵勢亦緩不濟急至
湖北餉缺兵單情形萬分危急粵餉十萬餘兩見雖道路梗塞亦
豈可盡數截畱置大局於不顧著駱秉章於此項銀兩酌畱三四
萬兩餘著派員迅速繞道解赴台湧軍營以資接濟萬不可心存
畛域稍事遷延蔣徵蒲所捐錢文催解到省除就近酌畱外其餘
亦可兩省通融濟用本日據青麀奏武昌兵食缺乏請由南省交
界州縣撥運米二萬石解往湖北等語並著駱秉章趕緊設法將
湖南州縣徵存米石酌量派員撥解以濟軍糈將此由六百里加
緊諭令知之○湖北巡撫青麀等奏報渡江剿賊獲勝情形得旨

此次並非大勝何必如是鋪張出力人員姑念其處於賊心處處棘手且固守多日省垣暫可無虞著准其擇尤保奏數員以示獎勵又奏據探德安失守由督臣撤回各路將弁以致賊勢日張批德郡之失固台湧之罪然潰散情形出乎意外汝在彼時幸賊未竄至設該逆已撲德安汝豈能守見雖憤惋已無及矣汝摺云不敢不豫爲陳明太不成話不過希冀免處分起見亦覺小氣朕非臆度於事後實時勢所必然也○己卯常雩祀 天於 圜丘○庚辰諭軍機大臣等勝保奏連日追賊情形一摺該大臣前奏逆匪奔上梁山乘夜南竄計節次擊斬所餘不過四五千入我兵步隊縱或不能趕到何以跟蹤追擊之馬隊亦不能極力扼截致令徑由鉅野金鄉竄入豐縣我兵忍飢追趕晝夜馳騁誠屬實情而該逆於鉅野穿城而過金鄉不敢入城沿途皆曾被蹂躪之區諒

亦無可擄掠以窮蹙喪膽之眾其行轉疾於得勝之兵殊不可解
豐縣緊接黃河設再令由偷渡處所依舊南奔該大臣但事尾追
竟不能將此窮寇埽除淨盡但謂河北肅清豈遂可以塞責若令
久踞豐縣又復築壘窆壕我兵但事圍攻如靜海阜城故事久且
仍令逸出與皖省賊匪復圖勾結勦辦何時蕆事據奏沿途勦殺
多名見存不過三千餘賊急應嚴催後隊官兵迅速到齊盡數殲
除該縣前經賊匪竄擾復疊經諭令百勝王夢齡嚴防河岸不准
南來之匪續行北竄卽不得令北路之匪回竄而南何至一無準
備縣城復爲賊踞是否該縣文武先期逃避該處土匪勾結開城
該鎮道專轄河工地方何以不派兵迎截與該大臣追兵合力夾
擊著該大臣查明速奏並先將畏葸逃避之員卽於軍前正法至
所稱乞降脅眾三百餘名旣已蓄髮數寸豈得因其詞意懇至信

爲商賈村農墮其奸計其甘心久於從賊卽應概予駢誅且金鄉甫被滋擾人心未固又以此項降眾多名安置該縣焉保其不故技復萌爲河北畱此餘孽卽暫令薙髮豈能革面洗心並恐豐縣城內卽有似此匪徒先行潛入以致迎賊失陷該大臣務須濟以嚴明不事姑息將此股餘匪剿殺無遺迅卽收復縣城萬不得令復行渡河滋擾致干罪戾將此由六百里加緊諭令知之○諭據官文奏賊擾監利力籌剿辦一摺該處接壤江陵爲荊州要衝亟應及早殲除免致蔓延爲患官文見復添派弁兵前往協剿合之守備福興等管帶進剿之兵勇一千二百名是否足敷剿辦駐紮巴東之建昌松潘二鎮官兵節經諭令裕瑞迅飭帶兵之總兵雙保福忻飛速前進何以尙未趕到著官文等趕緊派員迎提毋任再有延宕一面就見有兵勇督飭在事文武員弁併力截剿剋日

收復縣城貴陞統兵駐紮荊郡水陸要隘自係爲嚴密籌防起見仍須探明逆蹤所向相機迎擊力扼賊衝總期該逆無由上竄西北則荊州要地庶可無虞其竄回岳州之賊大舉南犯已由甯鄉直趨湘潭是南北軍情均形喫緊旣不能斷賊江面往來之路尤不可不防其乘虛窺伺闖入荊江並著官文激勵城守兵丁妥爲布置以固藩籬舒倫保早經行入豫境不日即可抵武勝關本日復傳諭柏山一俟該將軍到關後卽會商督兵前進與台湧合力進攻所有竄入隨州賊眾目下能否稍挫其鋒分踞應山等縣各匪如何次第剿洗前調之武勝關及黃土關各兵已據英桂奏報飭令啟程台湧惟當乘此兵力漸集迅圖攻克各城仍隨時與英桂聯絡聲威遏賊北竄之路並設法知照青麐等互爲援應方爲周密粵東應解台湧軍餉十餘萬兩昨經駱秉章等奏稱因道路

梗阻暫畱湖南當諭知該撫等止准酌畱三四萬兩餘仍解赴楚
北以濟急需其四川解楚餉銀亦准官文等酌量畱用但不得全
數截畱轉滋貽誤卽著台湧分委委員迎提濟用又據官文等片
奏川勇滋事情形此項潰散募勇沿途擄掠復敢抗拒官兵施放
槍礮尤屬目無法紀著官文等迅卽查拏爲首滋事者正法數人
以儆其餘仍一面派員妥爲彈壓毋致別生事端將此由六百里
加緊各諭令知之○諭前此逆匪由豐工竄越黃河長驅北犯百
勝王夢齡近在徐州防河是其專責乃任令逆眾從容紮筏偷渡
已屬形同蟬賸比經勝保由臨清扼截追殺該逆果卽亡命南奔
節次嚴諭楊以增並百勝王夢齡等加意嚴防毋令南賊續行偷
渡北賊乘虛竄入該鎮道等應如何實心堵禦稍贖前愆茲據勝
保馳奏由鄆城之梁山一路追剿直至金鄉以南沿途斬擒無算

下餘逆賊二三千人竟於初七日竄入豐縣城中是直以歷奉嚴旨視爲具文殊堪痛恨該逆負隅死守乃其長技豐縣一城爲南北衝要西與豫皖接壤尤不可不防其會合勾結致令廬州六安之賊接踵而至復肆鴟張著楊以增嚴飭百勝王夢齡一面就見有官兵練勇督令隨同勝保協力進攻一面分防南北河岸母令該逆復又乘隙竄突儻賊匪不能剋期剿滅堵禦仍有疏虞朕必將百勝王夢齡立予正法斷不能再從曲宥楊以增職司總河亦不得以該處距臨清稍遠謂可置身事外希冀倖邀寬典也懷之勝保追賊迅速糧臺未能隨營前進並著飭令附近各地方官隨時妥籌接濟毋誤餉需將此由六百里加緊諭知楊以增並傳諭百勝王夢齡知之○辛巳諭內閣羅惇衍奏請將被脅打仗傷人未死之犯照原辦發遣一摺巡防處疊次拏獲形迹可疑人犯經

該王大臣等審明定擬具奏朕覈其情罪較重者卽立正典刑其實係被脅愚民或情節稍輕未當不量從末減若實係甘心從逆之犯既有打仗殺人重情亦不曲宥乃該侍郎奏稱被脅打仗傷人未死乘間逃出各犯以前各案均擬發黑龍江後因陳敬汶一案奉硃批再訊遂以立決定讞等語被賊裹脅之人聽從逆匪打仗拒傷官兵罪狀已屬顯然所傷之人亦安知其不死豈能遽聽該犯等一味狡展避重就輕若該犯等如果實有冤抑羅惇衍係巡防大臣卽不應隨同畫囊何竟待數月之後始爲此奏又稱李春業尙克明李四兒鄭幗華四案皆傷人未死亦從嚴照陳敬汶一案辦理是該侍郎以此四案之擬結均照陳敬汶案辦理情罪多有未當如果屬實該侍郎又何不於定案時單銜具奏據理建白且旣以該犯等不當立正典刑又何不隨時奏聞俟有四案之

多數月之久始行入奏假使死者果有含冤已無救矣羅惇衍平日毫無定識徒好虛名已可概見至所稱屢懷是念欲言而止者再三尤不成話試思身爲大臣秉心如果忠正又有何避忌而不言耶至解散脅從等事見在僧格林沁勝保等每遇裏脅之人無不隨時解散安爲安置以孤賊勢並非一概駢誅使蚩蚩之氓無逃生之路大小臣工陳奏事件辭尙體要古今時勢豈能強同該侍郎徵引事實意在誇多按之寬猛相濟之道殊多未諳另片奏請飭湖北學政馮譽驥仿照孫銘恩幫辦防勦事宜等語馮譽驥經朕特簡湖北學政該員才具能否辦事朕心自有權衡又豈待該侍郎保奏始能上達至稱伊係文慶門生文慶亦素相推許並有學官間居無用不如幫辦青營軍務之語羅惇衍若深知馮譽驥之才又何必牽涉師生致蹈援引標榜惡習所奏尤屬非是羅

惇衍著傳旨申飭○諭御史英匯呈進金陵被難記並請照刊散給廣勸團練一摺各省賊氛竄擾地方辦理團練保衛鄉閭本係禦賊要務前已疊次降旨並將嘉慶年間團練章程刊刻頒行原期薄海臣民共見其間遵行罔懈若該御史所進金陵被難記不過巷議街談敘述一地一時之事民間流傳原所不禁若必官爲刊刻尙復成何政體至逆匪擾害地方慘酷詭詐情形凡罹其毒者孰不恨深刺骨志切同讐奚待刊刻此書家諭戶曉始能振興民志耶英匯所奏殊屬冒昧原摺及所進金陵被難記均著擲還○諭前因李湘棻並非見任大員冒昧具摺當降旨降爲三品頂帶今又具摺謝恩亦屬非是著傳旨申飭覽該員奏摺前載硃批有朕謂其遇賊接仗大獲全勝方准專摺具奏今並未見賊猶以大員自居且銜名寫出降爲三品頂帶明係負氣狂妄李湘棻著

革去頂帶仍責令協同剿賊○諭色克通額等奏和伯克賽哩土爾扈特親王策林喇布丹等情願捐輸馬匹呈請代奏請旨一摺據稱和伯克賽哩土爾扈特親王策林喇布丹副盟長扎薩克頭等台吉喇特那巴咱爾扎薩克頭等台吉圖布慎克什克等因南省逆匪跳梁見在官兵前往攻剿需用馬匹願共捐馬五百匹實出至誠洵屬可嘉惟此項牲畜該王等藉資養贍其所捐備馬五百匹著卽停止以示朕矜恤蒙古之至意○僧格林沁等奏逆匪自占踞濠邊我兵連日進攻斃賊無數並雇覓人夫另挖長濠該逆恐長濠工竣不能脫逃於初九日夜全股南竄臣等當卽帶領馬隊官兵跟蹤追擊沿途殄斃多名奪獲大礮三尊該逆分爲兩股一股抗拒我兵一股竄至連鎮查連鎮東西兩鎮中隔運河我兵追至河邊苦無船橋臣僧格林沁沿河尋渡至距連鎮二十里

之東光縣地方始得渡河該逆已搶劫民間木料搭造浮橋占踞

東西兩鎮並附近村莊見在臣僧格林沁臣西凌阿在河東紮營

臣托明阿在河西屯紮趕緊催調步隊以便合力進攻並令侍郎

培成副都統那敷德帶領馬隊官兵星夜馳赴桑園地方擇要屯

紮一得該逆竄逃之信卽迎頭截擊上諭軍機大臣等此次追

剿賊匪雖有斬獲而我兵傷亡亦復不少該逆竄據阜城已幾兩

月朕疊降嚴旨諭令埽穴擒渠不准再有竄逸於該大臣調兵調

礮無不立允所請原冀僧格林沁及早將此股賊匪殄滅以保全

朕倚任之恩茲閱該大臣奏報卒令潰圍撲出復踞連鎮我兵追

剿又落後著該大臣疊次所謂布置者安在僧格林沁前次追賊

尙屬迅速何近日遲延貽誤若斯之甚且逆匪亡命狂奔毫無阻

滯我則必須繞越渡河使該匪得以從容設備該大臣貽誤之罪

夫復何辭連鎮地方分據運河兩岸西南可達景州東南可達吳橋由河而北又距泊頭鎮不遠若不就地殄除又恐蹈獨流故轍剿辦何時蒞事昨據勝保奏臨清逸匪竄入豐縣該大臣督兵追殺多名餘匪不過二三千名不日即可殲滅惟追剿逆匪不分晝夜利於遄行馬隊多有疲乏落後不敷攻擊前次諭令僧格林沁迅飭明慶帶兵助剿原有刻不容緩之勢乃該大臣此次奏報猶有十一日明慶督兵壓賊之語是並未遵旨令該副都統前往勝保軍營又不能迅速將此股逆匪殲滅無遺專力南注兩失機宜朕實不解該大臣之意僧格林沁接奉此旨後仍飭令明慶督兵南下無再延誤此股竄匪務當乘其喘息未定督飭馬隊官兵實力截擊悉數殲除儻再令該逆又在連鎮地方久踞或又竄踞他處朕必治僧格林沁貽誤之罪別亦無可再諱矣將此由六百里

加緊諭令知之○以王履謙爲左副都御史吳鼎昌爲太常寺卿
由廣西布政使遷○于江西陣亡府經歷湯道增祭葬世職○壬午諭內

閣本日勝保等由八百里馳奏官兵勦辦賊匪殄滅淨盡首逆伏
誅一摺逆匪占距豐縣偏脅居民起築木城意圖拒守初九日勝
保督飭兵勇分攻四門拋施火罐噴筒木城之內西南北三面同
時延燒賊眾大亂避匿入城勝保知該逆勢難久踞飭令帶領馬
隊各員分路布置該逆果乘夜向西南竄出見我兵列隊甚嚴折
而東竄我兵追及斃賊數百名賊勢不支拋棄槍械向前奔竄我
兵追殺已抵漫口支河河水斗漲湍流甚急騎馬賊眾千餘名均
陷於泥淖我兵槍箭齊施殲斃無數逆眾百餘圍繞逆首旋轉河
岸因我兵連放槍箭賊數十人無可倖逃全數躍馬入水所有偽
丞相曾立瑯許宗陽均已淹斃廣西老賊悉數殲除並無一名漏

網逆匪由豐北渡河竄入東境勢甚猖獗經勝保等督兵迎剿克復臨清州城屢獲勝仗該逆勢窮力竭亡命狂奔復經該大臣督率馬步官兵晝夜窮追馳行數百餘里於豐縣漫口支河將潰竄餘匪二千餘名全數殄滅辦理甚爲迅速深堪嘉尚勝保著加恩賞加太子少保銜並賞還花翎開復降級畱任處分並頒賞御用冠一頂巡幸袪一件御用鈕帶一分大荷包一對小荷包四箇珊瑚帽頂一箇白玉巴圖魯翎管一支德勒克色楞善祿均著賞穿黃馬褂並頒賞黃馬褂各一件大荷包各一對小荷包各二箇白玉巴圖魯翎管各一支以示優獎所有在事出力之文武員弁兵勇著該大臣等查明保奏候朕施恩見在阜城賊匪竄踞連鎮經僧格林沁督兵攻剿屢有斬擒著勝保酌帶馬步兵勇迅速會剿掃蕩妖氛肅清畿輔以慰眾望○諭軍機大臣等昨因勝保追賊

進行馬隊多有疲乏不敷攻剿復催令僧格林沁迅飭明慶督帶馬隊官兵助剿本日據勝保馳奏剿辦臨清竄匪於初九日在豐縣黃河北岸殄滅淨盡因聞阜城逆匪全股撲出擬酌帶馬步各隊官兵分兩岸前進確探賊蹤相機迎截等語此時明慶所帶馬隊著毋庸再行前進仍畱營中以資攻剿該大臣惟當懷遵疊次嚴旨速將連鎮盤踞賊匪就地殲除無畱餘孽不得因勝保督師折回稍存觀望致失事機刻下大江南北尙未蕩平皖楚賊氛甚熾朕懷南服深切隱憂而阜城之賊圍攻兩月尙未能悉數殲擒又令他竄爾等帶兵大臣當如何愧憤焦急迅圖蕙事勝保剿辦臨清竄匪能將全股殄除辦理甚屬迅速本日已降旨嘉獎以勵各省軍營惟速稱河北一律肅清竟以紅旗報捷迹涉矜張殊失朕望此時連鎮餘匪再加以勝保得勝之兵自無難剋期殄滅

僧格林沁秉心誠樸不尚虛文朕所素知卽日連鎖全股賊匪殄滅亦不必以紅旗報捷致涉鋪張該大臣務當與勝保合力同心迅奏膚功其膺懋賞也將此由六百里加緊諭令知之○諭勝保奏追剿逆匪殄滅淨盡並懇請陞見各摺復片奏安置步隊親督馬隊各兵迎剿阜城竄匪等語該大臣轉戰經年力挫兇鋒茲復從臨清追賊直至豐縣將此股逆匪悉數埽除自宜渥沛恩施以酬勞勩並令各省軍營將士知所感奮迅奏蕩平惟楚皖逆氛方熾大江南北首惡稽誅東南民生顛連困苦之狀朕每一思之難安寢饋卽阜城窮寇見復南竄連鎖思爲困獸之鬪未能卽時廓清肘腋之患未除宵旰之憂彌切乃勝保遽以紅旗馳報河北肅清不知朕所望於該大臣者至大至遠似此鋪揚過甚殊覺迹涉矜張該大臣承受朕恩益當加以敬畏軍士從征勞苦致器械衣

履不齊卽飭趕緊備辦仍一面加意拊循至步隊各官兵著照擬暫令駐紮曹州派善祿統帶按捕餘孽彈壓土匪就近與百勝等聯絡聲勢嚴防南匪續行北竄並可爲豫楚一帶援應該大臣旣令馬隊官兵緩赴大名親自統帶分兩岸前進迎剿阜城竄匪卽當與德勒克色楞兼程北行會同攻剿此時斷難來京陛見昨據僧格林沁奏該匪於初九日夜全股南竄連鎖此股不卽殄除恐蹈獨流故轍著勝保於沿途確探賊蹤所在迎頭兜擊與僧格林沁合力夾攻不准該逆蔓延他處並不得令久踞連鎖重煩兵力務期迅速剿除朕方拭目以待該大臣等肅清河北同膺懋賞也朕於疊次諭飭勝保之旨訓勉之中恩眷備至該大臣果能時刻懍遵與面承方略無異亦何必亟請入覲始能稟受機宜且朕旣信任該大臣畀以統師重任該大臣旣知無不言朕亦悉如所請

不爲遙制尙何虞有所隔閡總以羣醜悉就殲滅寰宇均獲乂安
爲該大臣之不負朕望耳將此由六百里加緊諭知勝保並諭德
勒克色楞善祿知之○袁甲三奏臣軍於義門集一帶獲勝後復
分派兵勇各路接拏劉陽兒等七十餘人並出示解散脅從該匪
等頗知悔悟散歸團練者甚多臣因大局已定急赴臨淮不能久
駐該處派委候補直隸州王啟秀前赴該處一面接捕餘匪一面
整頓團練俾良民之氣漸次鼓舞並函致徐廣縉飭令總辦歸陳
團練之知縣祝塏與亳州聯爲一氣時出巡哨臣卽於三月二十
二日自臨渙啟程於二十九日行抵臨淮隨督同郎中李文安等
詳加履勘淮南淮北分布紫營西至懷遠東至五河皆可聲息相
通至定遠界接廬城見經和春福濟等於店埠柘皋等處各安大
營以遏賊竄之路所需餉銀軍械均由臨淮派勇分起護送臣復

親赴臨淮以南查看總鋪爲定遠北路衝要兼通鳳陽五河擬令吉連等在彼紮營以爲南北聲援至正陽關一路秦定三見已到防西路似可無虞惟沿淮土匪猖獗頗甚見雖暫時退避終非了局正籌辦間據懷遠縣飛稟有鳳臺捻匪三四人擾至該縣西鄉棗木橋等處聲言進城報仇該處團練爲其所敗人心甚屬驚惶臣卽派撥兵勇一千五百名趕赴該處並飛飭附近州縣一體堵剿至鳳陽定遠壽州交界各處臣已出示曉以利害散其脅從就見在情形而論似尙不難撲滅惟賊氛逼近難保不與句通卽如臣前次剿辦亳州義門集大股該匪等顯係受逆賊指使見在永亳一帶尙未敢十分放心緣該處爲江皖豫交界地方積匪多年距城甚遠地方官往往不能兼顧雖經臣將大股擊散而逆氛一日不除卽人心一日不定應請飭徐廣縉就近查看如有嘯聚

隨時剿捕庶不至餘燼復熾重煩兵力 上諭臨淮以南地勢以

總鋪爲定遠北路要衝且可通鳳陽五河卽著飭令吉連等擇要紮營藉壯聲援鳳臺捻匪擾至該縣西鄉業經袁甲三撥派兵勇趕往堵擊仍須嚴飭附近州縣一體殲捕庶免蔓延至解散脅從固爲辦賊要著但欲化莠爲良必當察其情僞眞能悔悟方可免罪入團斷不可令匪類潛蹤致墮奸計臨淮爲大營運餉必由之路著多派兵勇隨時防範永亳一帶素多積匪刻下義門集等處匪徒雖已擊散尙恐餘燼復然徐廣緒見在歸陳各屬辦團著令該革員就近梭巡不時出哨爲防患未萌之計將此由六百里加緊諭令知之○以胡興仁爲廣西布政使夏廷樾爲四川按察使

由鹽茶道遷

○癸未諭內閣昨日新授國子監滿洲司業蘇勒布具摺

謝恩因繕寫伊名不成清語當令軍機大臣傳旨詢問該員於本

人之名既不知講解卽摺內字句亦均不能認識司業爲課士之官有考試清文之責且該衙門奏摺文案應用清文之處亦復不少若一字不識憑何覈辦蘇勒布身係旗人竟忘本業可惡之至著仍降爲編修以示薄懲八旗人員騎射清文是其本務卽使於清文義理不能精通亦豈有不曉清語不識清字遂得自命爲旗人之理道光年間特奉 諭旨停止駐防文試專考繙繹原期返樸還淳俾我八旗子弟咸知本業乃近日八旗人員仍有專習漢文於清語清字全不講求者沾染習氣徒驚虛文實堪痛恨嗣後無論何項出身人員均宜練習清文通曉講解卽由文鄉會試入仕之員及兵丁子弟亦應一體練習不准怠情偷安以誤根本經朕此次訓諭之後若再蹈從前惡習或於文字之間經朕看出或遇有詢問奏對茫然朕必將該員從重懲處不止如蘇勒布之從

寬降調也八旗大臣務當仰體朕意認真訓迪毋得視爲具文仍
前玩泄將此通諭知之○琦善奏報浦口官兵獲勝情形得旨武
慶屢次出力實屬奮勇著傳旨嘉獎○甲申諭內閣本年近畿一
帶春澤未霑自入夏以來望雨尤切朕旻念民依行當虔禱所有
本月二十日升殿著卽停止○僧格林沁等奏該逆占踞連鎮步
隊官兵陸續到齊臣等商定合力進攻臣僧格林沁臣西凌阿帶
領達洪阿由東岸進攻臣托明阿帶領瑞麟伊勒東阿由西岸進
攻我兵行至賊巢吶喊齊進該逆暗放槍礮密如雨下我兵冒煙
而進該逆隨由兩岸撲出數百名我兵槍箭齊發斃賊數十名該
逆拌死抗拒勢甚兇猛侍郎伊勒東阿左臂受鉛子傷仍負痛督
兵將該逆擊敗回巢是日之戰各路馬步兵無不奮勇爭先惟
盛京第七八起帶隊官員因馬受礮傷輒敢退後以致兩起兵丁

畏縮不前當攻勦萬分喫緊之際若不從嚴懲辦何以申明紀律相應請旨將營總佛恩恩祿卽行革職該逆竄忽靡定亟宜防其回竄及順流復擾天津見已將各營步隊官兵屯紮西岸先於西岸挑挖長濠並札調天津船隻停泊下游以阻其回竄之路其天津東南一面仍擬挑濠築壘待賊匪舍命撲出以便攻勦 上諭軍機大臣等逆匪竄擾連鎮跨河營巢若待其布置已定勢必至如獨流故事攻勦難以得手該大臣與西凌阿托明阿分紮東西兩岸並密防該逆回竄西北之路復將天津船隻停泊下游使賊眾不得擾及津郡逆匪自阜城竄出並非窮蹙奔逃一到連鎮卽死守抗拒該大臣於東西兩面挑濠築壘誠恐兜圍嚴密益堅該逆負隅固守之心此次馬步官兵雖極奮勇而賊巢仍未攻破且致伊勒東阿臂受槍傷是其明證不如誘令離巢設伏以待一俟

該逆撲出迅卽合圍兜擊俾該逆不得回奔入巢再以奇兵將賊隊衝斷勦洗更易得手著該大臣等酌量辦理萬不可專恃勝保兵到致延時日前據桂良奏張殿元達年駐守大名之兵移營南樂原以防東境冠縣朝城諸處竄匪見在該處情形無關緊要已諭令桂良將該署提督等所帶官兵移向景州交河一帶著該大臣察看何處緊急派令協防藉資堵勦前此因德勒克色楞接仗受傷特派乾清門侍衛恩全前往看視本日已諭令勝保迅飭恩全馳赴連鎮察看軍營情形回京覆奏該大臣務將見在賊情及一切布置告知恩全卽飭令回京以慰朕念將此由六百里加緊諭令知之○諭前據桂良奏張殿元等帶領官兵移營南樂原爲臨清賊匪竄至冠縣朝城而設見在東境肅清大名一帶毋須重兵駐守阜城匪眾竄踞連鎮又已數日設令相持日久恐該逆拒

守益堅耗我兵力著該督卽行飛飭張殿元達年等將此項官兵迅速統帶北行向景州交河一帶探明賊蹤就近偪攻仍飛咨僧格林沁酌量何處緊要將此項官兵派撥防剿毋稍遲延將此由六百里加緊諭令知之○以馬隊官兵剿賊退縮革營總佛恩恩祿職枷號示眾○乙酉諭內閣德齡奏遵旨明白回奏一摺前聞葉爾羌有建立德齡生祠旋被兵民毀像等事批令德齡明白回奏茲據奏稱咸豐二年葉爾羌商民捐貲立祠實不知情訪明後卽將原像折毀等語部民爲本官建立生祠例于嚴禁德齡旣未能先行禁止迨訪明折毀後彼時又不據實具奏實難辭咎德齡著交部嚴加議處○諭已革湖北巡撫龔裕前因藉病回籍飾詞巧避當降旨發往新疆效力贖罪茲據楊以增奏稱該革員因病未能起解捐餉贖罪懇請免戍等語龔裕係曾任巡撫大員特旨

發遣情節較重楊以增冒昧瀆請殊屬非是龔裕著不准捐輸仍遵前旨卽行發遣○諭軍機大臣等昨因楚豫交界防剿緊要諭令勝保將留駐曹州之陝甘官兵酌交桂明帶赴武勝關會同舒倫保台湧等相機堵剿茲據勝保奏於十三日與善祿督帶馬步官兵由運河兩岸同赴東昌探賊迎擊其桂明所帶陝甘官兵暫駐曹州等語曹州地方當南北之衝固屬緊要惟此時楚豫交界情形甚爲喫重自應仍飭桂明帶兵或一千名或一千五百名迅赴武勝關以資防剿善祿旣帶步隊官兵由金鄉一帶前進其留駐曹州之兵應派何員統帶著該大臣酌量情形迅速妥爲布置至阜城逆匪竄踞連鎮跨河營巢若我兵攻剿稍遲賊匪勢必負隅死守又蹈獨流故轍剿辦何時蕝事昨諭僧格林沁誘賊離巢設伏以待若該逆果向南潰竄該大臣等由運河兩岸前進正可

迎頭截擊儻伏匿連鎮該大臣務與僧格林沁合力夾攻就地鏖
除勿畱餘孽兵貴神速斷不可再有耽延致誤事機此次保舉單
開各員並無蒙古官兵是否該官兵於克復臨清時勦賊未甚出
力抑或有遺漏之處著該大臣迅速查明具奏蒙古列在藩服儻
著有勞績尤應破格請獎斷不可令其湮沒不彰至軍營打仗衝
鋒冒險武職居多勝保將文職開列在前亦屬非是統兵大臣首
在賞罰平允卽輕重先後之間亦須權衡至當始足以鎮服軍心
慎勿蹈重文輕武積習稍有偏倚也將此由六百里加緊諭令知
之○諭和春福濟奏勦賊獲勝情形一摺連日移營築橋督兵進
勦燒燬賊營雖拏斬尙多仍未能將廬州克復實深焦灼見在勝
保已將續行北來賊匪於豐縣地方全行殲滅廬州之賊自必聞
風膽落該提督等正當乘此聲威督率將弁兵勇迅復郡城不得

再事延緩秦定三計日已抵正陽關卽飭令督同郝光甲劉玉豹等剿辦六安霍邱一帶賊匪嚴防北竄毋稍大意安慶舒桐等處刻下賊勢如何亦須設法激勵地方紳民散賊黨與斷賊接應前據琦善先後奏稱賊船屢擾江浦六合等處多端窺伺皖省和州地方與江浦接壤急須派兵扼要駐紮嚴行防範既可固本省之藩籬又可爲江浦之聲援著卽相機布置隨時與袁甲三秦定三知照援應不可稍有疏虞將此由六百里加緊諭令知之○諭勝保奏山東土匪四起館陶一帶尤甚前次該大臣追剿逆匪所運車馱鍋帳等項沿途土匪肆行搶奪賊擾臨清時勝保派委吉林委參領阿昌阿防禦盛安委驍騎校額勒德恩佈三員帶兵二十一名善祿派委盛京驍騎校札音阿帶兵二名俱係密赴南路伺探賊蹤見聞在臨清以南姜家油房等處均被土匪搶劫戕害毀

滅屍身當此勦捕喫緊之時各處土匪竟至如此橫行地方官所
司何事實堪痛恨且大兵在境軍營所派官弁兵丁輒被劫害其
平時盜賊暴橫行旅居民慘遭荼毒者更不可勝計巡撫職在戢
盜安良平日卽應督飭所屬講求捕務刻下豐縣之賊雖除而阜
城餘匪尙在連鎮屯踞意圖他竄若山東境內任令土匪搶掠不
但擾害閭閻且恐嘯聚成羣與逆匪勾結爲患著崇恩嚴飭文武
官弁認真查拏務將此項土匪全數弋獲盡法懲治毋任一名漏
網致貽後患如該管官承緝不力任令戕劫官兵之犯遠颺或僅
拏獲數名以圖塞責卽著從嚴參辦崇恩前在山東亦因緝捕廢
弛獲咎若再不力贖前愆何顏仰對 皇考及朕耶將此由六百
里加緊諭令知之○以克復臨清賞總兵官孔廣順桂齡提督銜
餘升敘有差○以攻勦廬州出力復副將鄭魁士職○丙戌朱嶠

以病免調何桂清爲倉場侍郎以張祥河爲吏部右侍郎

由內閣學士遷

○戊子

上詣

大高殿祈雨

○諭軍機大臣等勝保奏餘匪淨

盡督兵由東平一帶相機迎剿一摺該大臣於十五日卽抵濟甯十七日發摺後始行啟程尙須相機再進是直以班師自誦按轡徐行殊屬非是見在自阜城竄踞連鎮之賊卽係該大臣去年由豫晉追剿至直之賊並非另有一股此賊一日不滅卽該大臣一日不得辭責豈恃東境無賊爲全功而以應辦未了之事諉之他人耶據奏阜城賊蹤竄向何方尙無確耗何偵探遲滯至此連鎮之賊跨河營巢死拒不出幾與獨流相等僧格林沁挖濠築壘分紮官兵於東西兩岸並將天津船隻停泊下游布置雖周而進攻總未得手所殺逆匪不過數十名且有伊勒東阿烏凌額受傷之事該處地勢河東較河西尤固勝保見從東岸進兵卽當迅速馳

抵連鎮一面飛催善祿由西岸星速前進同抵該處合力進攻若
任意遲延徒以休息兵力爲詞自問何顏對朕功自功罪自罪斷
不能希圖相抵也另片奏知州黃良楷知縣盧朝安在籍侍衛田
在田各帶練勇投殺潰匿賊匪等語自應亟行獎勵所有帶勇各
員及出力團長練勇人等著准其歸入豐縣剿賊出力各員內一
體保奏候朕施恩該大臣此次追剿賊匪如此迅速若馳抵連鎮
將阜城竄匪與僧格林沁合力同心迅殲醜類肅清畿輔方不負
朕委任之恩也將此由六百里加緊諭令知之○予山東金鄉殉
難知縣楊鄭白祭葬世職○己丑諭內閣予告大學士潘世恩立
品端方學問醇正由乾隆癸丑科一甲一名進士授職修撰自翰
林海擢正卿 皇考宣宗成皇帝深加倚畀超登揆席簡任綸扉
總理部務入直上書房夙夜宣勤 特命肩輿入直晉加太傅

賞戴花翎並賞用紫韁 賞穿黃馬褂 恩眷益隆服官五十餘

年小心謹慎克稱厥職道光二十九年因腰脅作痛懇請開缺疊

蒙 恩諭慰畱朕卽位後因其年逾八表寬予假期俾得從容調

理因陳懇肫切勉從所請准其致仕並賞食全俸又因重與鹿鳴

恩榮筵宴疊加賞賚用昭篤眷方冀長承恩澤永享遐齡茲聞溘

逝悼惜實深著賞給陀羅經被派怡親王載垣帶領侍衛十員卽

日前往奠醑並著入祀賢良祠任內一切處分悉予開復應得卹

典該衙門察例具奏伊孫國子監學錄潘祖同著賞給進士准其

一體殿試翰林院編修潘祖蔭著以翰林院侍讀候補監生潘祖

保著賞給舉人准其一體會試用示朕軫念耆臣之至意尋予祭

葬諡文恭○江蘇巡撫許乃釗奏滬賊屢撲各營均經痛剿擊回

見在嚴飭將士勒限戴功得旨賊勢並未漸窮克復實無把握許

乃釗日久無功藉此敷衍甚屬可惡若以此報冀仰慰朕心適增朕之憂也○調萬壽黎爲吏部左侍郎以許乃普爲禮部右侍郎

由內閣學士遷

○庚寅諭內閣軍興以來屢經降旨諭令各督撫飭屬團

練鄉勇原期眾志成城人心自固該地方官果能實力奉行紳民人等定必踊躍用命自衛身家於剿匪事宜大有裨益本日署河南巡撫鄭敦謹奏據羅山縣探報湖北黃安縣南沙河地方有賊匪竄至經該處鄉民斃賊數百並約會河口等處鄉民殺賊五六百人奪回逆船六百餘隻並米糧衣物等件該縣合境居民聞風爭奮約眾追殺復斃賊數百人該民人等合力同心捍衛鄉閭甚屬可嘉若賊匪竄擾之處地方百姓皆能如此齊心禦賊何至任其蹂躪慘遭荼毒然總須地方官實心勸諭倡率有方遇有出力紳民卽行據實詳報上司隨時奏請獎勵庶使羣情觀感協助官

兵盡殲醜類所有此次黃安縣南沙河等處擊退賊匪之居民人等著台湧先行傳旨嘉獎並著查明出力紳民據實保奏見在被兵省分屢據奏報各屬紳民實能團練殺賊保衛地方者亦復不少著各路統兵大臣及督撫等嚴飭各府州縣勸導紳民一體實力團練果能辦有成效如近日天津饒陽單縣等處力挫賊鋒保全城邑者卽著隨時奏聞定當格外施恩以獎忠義將此通諭知之○諭軍機大臣等僧格林沁等奏撥兵赴楚防剿卽日馳赴連鎮會剿各一摺該逆於連鎮挖濠築牆意圖久踞我兵惟用大礮轟擊仍不能出奇制勝力破賊巢似此曠日持久剿辦何時戢事勝保於十九日行抵荏平計日已可行至連鎮兩軍會剿兵力較厚該大臣等務當協力同心迅圖攻剿儻該逆負隅死拒我兵不難四面兜圍爲就地剷除之計設勢蹙南竄仍可設伏以待出其

不意一鼓殲除軍情變幻靡常惟在該大臣等相機妥辦迅速奏功斷不可再延時日附近連鎮村莊是否有賊占踞萬勿任其裹脅居民並當嚴斷接濟使該逆援絕勢孤攻剿自易得力東北一帶尤應加意嚴防毋令搶掠船隻再滋延蔓至勝保請仍飭張殿元駐守大名之處前因東境肅清諭令張殿元達年赴景州交河一帶就近偏攻見據僧格林沁札調張殿元在吳橋達年在甯津帶兵屯紮該員等諒已遵辦前調山西澤潞官兵見在行抵何處若尚未到營即可令此項官兵駐紮大名以資防守如必須張殿元等折回該處著僧格林沁勝保斟酌妥辦毋以有用之兵置之無用之地至東路鹽山慶雲一帶與山東武定毗連地方防守官兵勢尙單弱著僧格林沁勝保妥籌應如何撥兵扼要堵截並知照崇恩嚴飭地方文武與紳民人等實力防堵萬不可稍有疏虞

致賊匪乘間竄逸該大臣等務當統籌全局合力進攻總期早滅妖氛肅清畿甸毋負委任將此由六百里加緊各諭令知之○諭前據台湧奏賊擾應山等處當經諭令防剿兼籌堵賊偷越北竄茲據鄭敦謹奏稱應山逆匪於初七日全數竄回德安隨州之賊亦竄武漢襄樊一帶尙無賊蹤並聞黃安縣之南沙河居民及河口等處鄉民約殺賊匪多名該逆見猶盤踞德安等語著台湧查明出力紳民人等分別獎勵以昭激勸本日已諭令英桂等於楚豫交界地方督率員弁兵勇實力嚴防著台湧卽就見在兵勇相機剿辦總兵柏山已由桐柏唐縣一帶進剿舒倫保計日亦抵信陽會同剿捕據勝保奏稱已遵旨飭令桂明帶兵二千名由曹州直赴許州一帶探明賊蹤迎頭截擊著台湧卽督飭見在官兵與各路赴援之兵合力堵剿不得專事株守致誤事機將此由六百

里加緊諭令知之○諭鄭敦謹奏探明豫省南路賊匪均已回竄並皖省捻匪竄擾戕官各情逆匪於初七日由應山竄回德安隨州之賊亦回武漢一帶總未大受懲創仍當防其窺伺再圖北竄該撫等已飭南汝光道余炳燾等扼要設防並有柏山及舒倫保等在信陽一帶堵剿見在各路官兵不爲單弱正當乘機剿辦迅殄賊氛英桂見雖告假仍當與該署撫鄭敦謹合力同心妥籌布置楊需計已抵豫務卽確探楚豫交界處所何路緊要卽帶兵馳赴該處駐紮協同防剿至安徽霍邱縣捻匪李兆受等竄入商城王家院牆地方膽敢聚眾撲營致戕害署副將春明及備弁兵勇多名見仍在卜家店地方嘯聚亦難保無逆匪在內勾結爲患該撫等旣飭牛鑑督帶兵勇二千餘名前往剿辦著卽責成該員督飭弁兵並勸諭地方團練實力兜剿以期盡數殲除勿畱餘孽署

商城縣知縣郎仲連於鄰省匪徒滋擾戕官毫無準備玩泄已極
郎仲連著先行革職仍責令隨同剿捕如查有畏葸先逃情事卽
著從嚴參辦陣亡被害各員及傷亡兵勇一併查明分別具奏請
卹此股賊匪據稱係由安徽霍邱縣竄入豫境霍邱與正陽關毗
連爲皖豫扼要之地秦定三見帶兵在正陽關一帶防剿著英桂
等隨時知照合力夾擊斷不可互相推諉致誤事機將此由六百
里加緊諭令知之○內大臣璧昌卒贈太子太保予祭葬諡勤襄
○辛卯駱秉章鮑起豹曾國藩奏逆賊大股水陸並進逼近省垣
陸路之賊先散踞岳州湘陰各境賊船分布臨資口樟樹港喬口
靖港等處連日北風甚勁大雨經旬水軍不能進剿北路水陸各
賊聚泊靖港港外環列戰船堅築礮臺爲負隅之計三月二十四
五等日臣曾國藩飭水師各營駛赴靖港更番疊擊約其斃賊二

百餘名擊沈賊船三隻燒賊火藥船一隻賊訶知省城水陸防剿
綦嚴不敢闖入欲由陸路繞越甯鄉徑撲湘潭臣曾國藩先遣湘
勇一千八百人扼要立營防賊侵軼二十五日賊分三股撲營湘
勇力不能支紛紛潰散二十六日塔齊布馳往援剿賊已於是日
卯刻由間道直赴湘潭塔齊布等亦卽繞道前進二十八日馳抵
湘潭縣城外高嶺地方賊前隊於二十七日已到署湘潭縣知縣
劉建德督勇於城外響水壩沙市嶺一帶堵禦賊已由西路暗襲
縣城分遣死黨四處擄船並在城北豎立木城意圖久踞塔齊布
以該逆頻年猖獗每用以守爲戰反客爲主之法若不及時速剿
賊壘一定攻克爲難卽於二十八日同周鳳山督帶弁兵壯勇分
路進攻賊營檣礮如雨塔齊布令兵勇聞礮卽伏礮止卽進數伏
數起直逼賊營各兵勇奮不顧身闖入賊營施放火箭火彈殺賊

五百餘名燒斃無算生擒三十餘名二十九日塔齊布等分路進攻賊分五路出撲我軍縱橫血戰立斬僞統領先鋒六名僞都督元帥三名斃賊六百餘名賊匪敗潰旋乘我兵造飯之時分路來撲我兵佯敗誘賊從營後繞出轟斃賊匪五百餘名追至嶺下塘邊四面圍逼淹死賊匪不計其數四月初一日賊復於城外高築木城選長髮老賊分路出拒塔齊布督率兵勇奮力衝突殺斃老賊數百人燒毀賊房無算生擒三十餘人追至城根復殺賊數百名其水面賊船經褚汝航等督率戰船分队進剿轟斃紅衣賊目十數名延燒賊船無數初二日復督船進攻擊沈賊船八十餘隻斃賊二百餘名褚汝航親點大礮擊死紅巾賊匪十數名又燬賊船二百餘隻斃賊三百餘名彭玉麟楊載福親坐小艇往來督戰先後燬賊船三百餘隻燒斃生擒賊匪三百餘名岸上之賊亦被

燒斃無算是日卯刻臣曾國藩親率大小戰船四十隻陸勇八百馳赴靖港上十里之白沙洲相機進剿午刻西南風斗發水流迅急戰船順風駛至靖港不能停畱更番疊擊逆賊在礮臺開礮適中哨船頭桅各水勇急落帆收泊靖港對岸之銅官渚賊眾用小划船二百餘隻順風駛逼水營水勇開礮轟擊臣曾國藩聞信急飭陸勇分三路速撲靖港賊營以分賊勢初三日塔齊布偵賊在潭城窑灣地方高豎望樓逆賊散處潭城總市將由水路逃竄知會水師迅速兜剿遇船卽燒其燬賊船六七百隻賊屍沿江漂流該逆被燒情急復回縣城委員江忠淑會同署湘潭縣劉建德設伏城隅乘隙登城開門接應塔齊布揮兵直入將城中賊匪盡數搜殺敗殘餘匪紛紛竄逸已飭塔齊布等四處接拏升用同知直隸州知州王鑫追賊至雲湖橋魯家壩等處殺斃數百名湘潭縣

城立即克復其由淶口竄至醴陵縣界約數百人將竄入江西萍鄉臣等飛咨江西撫臣速飭堵剿此次逆賊大舉南犯意圖竊踞湘潭與靖港之賊互爲首尾儻不及早撲滅不獨省城孤注難以圖存衡永郴桂及兩粵匪黨聞風響應東南大局不堪設想幸仗皇上威靈八日之間水陸十獲大勝全股掃蕩賊黨已寒見在靖港一股亟應回軍剿辦俟水陸兵勇調回卽行相機進攻補用副將塔齊布忠義奮發勇敢當先士卒樂爲之用通城剿賊已獲大勝此次復著奇功實屬武弁中傑出之才懇請賞換花翎加總兵銜並賞給勇號其餘文武員弁並請逾格恩施給予獎敘曾國藩又奏臣派水師剿賊靖港初二日靖港水勇潰散實由臣調度乖方自去冬欽奉諭旨速援皖鄂兩省盼望旣殷臣之求效愈急而其辦理亦愈乖謬征戰之事論膽技則兵不如勇論紀律則勇

不如兵募勇萬餘人必須有大員協同管帶又須有文武員弁及
得力紳士一二百人節節統轄乃足互相維繫臣先時未能奏請
大員幫同管帶又未多調文武員弁分在各營每營僅有一二官
紳主之紀綱不密維繫不固以致潰散其謬一也靖港之戰臣因
湘潭水陸大捷意欲同時並舉破賊老巢使賊首尾不能相顧是
以風順水流進戰則疾駛如飛退回則寸步難挽逮賊舟來偏礮
船牽挽維艱或縱火自焚或間以資賊戰艦失去三分之一礮械
失去四分之一是臣但知輕進之利不豫爲退敗之地其謬二也
水勇無曾經行陣之人不得已召集船戶水手編派成軍訓練未
及一月陸勇雖經訓練亦須隨同久經戰陣之兵接仗數次乃可
期其得力今驅未習戰陣之勇驟當百戰兇悍之賊一營稍挫全
軍氣奪非真勇不可用乃臣不善調習而試用之故其謬三也臣

整軍東下本思疾驅出境乃該逆大舉南犯臣師屢挫鄂省危急不能速援江面賊氛不能迅掃大負聖主盼望殷切之意請旨將臣交部從重治罪並懇天恩特派大臣總統此軍臣非敢因時事萬難遂推諉而不復自任未經赴部之先仍當竭盡血誠一力經理如船隻已修水勇可恃臣亦必迅速駛赴下游不敢株守片刻又奏臣於二月間知水勇未可盡恃咨會勞崇光代募水勇二千名已准咨覆派知府李孟羣管帶來楚尙未見到又查有廣西臬司許祥光右江道張敬修皆夙諳水戰素蓄健卒製備火器多而且精該二員膽識過人與見在臣軍之褚汝航新經咨調之李孟羣均堪膺水路統領分領之選相應請旨飭令許祥光張敬修各帶精勇礮械來楚併入此軍厚集其勢以保東南之全局儻蒙俞允得謀勇兼優之大臣主之於上而以此數員者分布其間

必能同心勦力迅掃逆氛則臣雖身膺重罪亦足少紓耿耿之忱
上諭軍機大臣等此次湘潭水陸連獲大勝殺賊甚多惟大股
雖已殲滅而靖江賊巢並未能同時攻破曾國藩復以輕進遭此
挫衄若不亟圖剿辦恐該逆負隅抗拒必致牽綴我師阻扼南北
要衝駱秉章等見既移軍回剿務卽與塔齊布等乘此聲勢水陸
夾攻爲一鼓成擒之計斷不准任令該逆踞巢死守再肆鴟張所
稱由湘潭上竄下竄餘匪究竟奔突何處亦須探明趨向分派將
弁竭力按捕其由醴陵將竄萍鄉一股並著迅飭江西交界各文
武一體嚴密堵剿毋任蔓延曾國藩統領舟師屢有挫失此摺所
陳紕繆各情朕亦不復過加譴責見在所存水陸各勇僅集有四
千餘人若率以東下誠恐兵力太單該革員見復添修戰船換募
水勇據稱一兩月閒當有起色果能確有把握亦尙不難轉敗爲

功目下楚北賊蹤由應山竄回德安隨州之賊亦回武漢是鄂省
望援甚急該撫等務當督飭水陸各軍迅將此股敗竄之匪殲滅
淨盡兼可赴援武昌以顧大局鮑起豹以提督大員安坐省中一
無布置該撫等屢次奏報打仗情形均未敘及該提督之畏葸無
能已可概見本日降旨將鮑起豹革職不准畱營特命塔齊布署
理提督全省水陸各營皆歸統轄該署提督責無旁貸卽著統領
各路將弁相機進剿以期迅掃賊氛毋稍延誤將此由六百里加
緊諭知駱秉章並諭塔齊布曾國藩知之○諭曾國藩奏請飭廣
西臬司許祥光右江道張敬修候補知府李孟羣統帶水勇來楚
以資台剿等語見在廣西土匪剿辦正當喫緊而湖南水勇戰船
又亟須大員統帶本日據曾國藩奏潯梧一帶雇募水勇業經該
撫咨覆交李孟羣管帶其許祥光張敬修二員能否赴楚助剿著

勞崇光酌度緩急毋得顧此失彼妥籌辦理將此由六百里諭令知之○曾國藩奏靖江水師潰散請交部從重治罪得旨此奏太不明白豈已昏憤耶汝罪固大總須聽朕處分豈有自定一擊問之罪殊覺可笑想汝是時心搖如懸旌漫無定見也○以株守無能革湖南提督鮑起豹職以塔齊布署湖南提督○以湖南水師失利革前任禮部侍郎曾國藩職仍戴罪勦賊○以克復湘潭縣城賞副將塔齊布總兵銜巴圖魯名號守備周鳳山千總楊載福花翎餘升敘有差○癸巳諭內閣袁甲三奏革員帶兵駐守任賊竄逸等語已革漕運總督李湘棻統帶兵勇駐紮郝家集當東境逆匪經勝保等督兵追勦時早應嚴密布置遏賊竄路若如所奏此次敗逃餘匪由豐縣竄入蕭縣境內經該縣文武督飭團練兩次接仗而李湘棻駐兵南岸並未擊殺一賊該革員本係獲罪之

人經朕棄瑕錄用宜如何激發天良力圖報效乃於防勦喫緊之際任賊竄越懦怯無能實堪痛恨卽著袁甲三查明該革員如何遇賊退避情形據實嚴參毋稍徇隱○諭軍機大臣等朕聞阜城逆匪竄出時察哈爾官兵並未知覺迨將防濠之礮挪向營盤轟擊始知賊出兵已大亂林鳳祥爬越濠溝平毀濠牆賊眾跟出以致焚毀營盤搶去帳房百餘架馬匹駝隻數百匹傷亡兵丁數十人前據僧格林沁奏稱逆匪於初六日子刻撲出重濠然燒帳房僅請將培成摘去頂帶烏凌額尙請因傷從寬免議迨逆匪竄至連鎮始奏稱培成營盤陣亡官兵八十餘名並未將培成失事實在此情形及被賊搶去帳房駝馬火藥各情詳細入告是該大臣前次奏參培成顯有不實不盡逆匪竄踞阜城疊據僧格林沁等奏稱竄築濠牆杜賊竄逸乃初六日賊踞濠邊初九日全行南竄此

數日中不能設法堵剿以致該逆竄踞連鎮餘燼復然重煩兵力
可見該大臣平日布置盡屬空談毫無把握至各營帶兵大員均
歸該大臣節制有功則賞有罪則懲毫釐不容假借儻有失事之
員卽當據實嚴參又豈可諱敗爲功所有培成營盤如何被燒逆
匪如何撲出培成及該營兵丁是否在營何以毫無知覺帳房等
件被賊搶去若干著該大臣迅速詳查據實具奏儻有一字虛捏
是僧格林沁自蹈欺罔之罪斷難逃朕洞鑒也該大臣於軍營一
切事宜自當秉公酌辦方足以折服人心不可稍有瞻徇回護致
負委任朕又聞該大臣延覓喇嘛在營諷經設醮此雖係蒙古素
所崇奉但當剿賊喫緊之時恐兵丁等專務此事於防剿或有疏
虞豈此事所能補救也該大臣惟當力盡人事不可以不急之務
致懈軍心將此由六百里諭令知之尋奏遵查該逆前次撲出站

牆乘風縱火將培成營盤帳房燒燬失去駝馬百餘匹培成及營兵等當時俱在營盤未能救護得旨培成著革職畱營效力贖罪○諭袁甲三奏豐縣餘匪渡河南竄見飭各路兵勇堵剿一摺逆匪由豐縣竄出經勝保等督兵追剿斬擒殆盡據稱徐州鎮道亦各督兵勇截殺餘匪渡河時人馬並不甚多何以竄至蕭縣境內尙能與兵勇兩次接仗且由蕭永一路沿途竟至裹脅二三千人竄擾蒙城前據百勝王夢齡奏稱分紮豐上南北兩岸扼賊南竄又有李湘棻在南岸郝家集一帶防堵何竟任賊竄越到處裹脅所謂督兵截殺者安在該給事中旣派遊擊李成虎等與臧紆青統帶兵勇會同剿辦著卽督飭帶兵文武員弁迅將此股逸匪卽在蒙城就地殲除斷不准再令他竄致滋蔓延前有旨諭令秦定三於抵正陽關後督飭郝光甲劉玉豹等剿辦六安霍邱一帶賊

匪並諭和春福濟於和州與江浦接壤地方防賊窺伺原恐金陵及廬州逆賊再行分股北來續圖援應該提督等務當於各處要隘實力嚴防毋得稍涉大意李湘棻在南岸郝家集駐紮未能堵賊已明降諭旨令袁甲三查明參奏該革員所帶之兵一千餘名必須妥爲安置著交百勝王夢齡就近調撥並著袁甲三迅卽揀派得力將弁前往管帶以資防剿勝保由臨清追賊南下除沿途擊殺賊眾其餘匪逃散偷渡者亦必不少且皖省逆賊聞風亦難保不續來勾結爲救援之計此時總宜嚴遏南來之賊並速將渡河回竄餘臣勦洗淨盡若稍有遲延令與逆匪糾結又圖北竄惟該提督等是問將此由六百里加緊諭知和春福濟袁甲三秦定三並傳諭百勝王夢齡知之○袁甲三奏臣前因鳳臺捻匪竄擾懷遠派遊擊李成虎署鳳陽縣知縣姚德賓會同前往嗣該文武

馳抵茆塘集探聞擒首張祥陳瀾翔張茂等糾合眾擒肆行焚掠聞官兵將到復圖回竄鳳臺之黃家岡一帶李成虎等行抵該處詢悉該匪等多伏匿各村整隊前進擒匪三四千人蟻擁撲來我兵直前迎擊斃賊一二百人並將張祥及著名兇悍之李導聲擒斬該匪紛紛潰散我軍追擊十餘里復斃匪百餘人並按殺陳瀾翔見飭將張茂迅速購拏斷不任其漏網報聞○甲午諭軍機大臣等蔣霽遠奏剿辦獨山匪徒連獲勝仗一摺此次獨山州土匪陸阿潰等勾結粵匪楊元保等滋事抗拒官兵攻撲州城業經護古州鎮總兵彭長春候補道承齡督派副將彭壽署守備王敦倫等帶領兵勇馳往應援疊獲勝仗並將首犯陸阿潰擒獲餘匪散竄勢已窮蹙惟播讓等處山硎叢雜若不悉數殲除仍恐廣西及本地不逞之徒互相勾結再滋蔓延該撫務當督飭彭長春等乘

此聲威併力兜拏務將首犯楊元保擒獲盡法懲治並將此股匪徒迅速就地殲滅勿畱餘孽一面飭令紳士等分赴各寨安撫居民整飭團練以爲官兵聲援所需軍餉准其於防堵經費內撥銀四萬兩樽節動用事竣覈實造報毋許浮冒將此由六百里諭令知之○內閣學士盛桂因病乞休允之○乙未 上詣 大高殿

祈雨○諭內閣前據文謙奏請酌借官票發商生息當經降旨交端華全慶體察情形據實具奏茲據奏稱以承借之票作爲應交之款名爲奏銷無紕實則減課五成不但借項歸款無期且恐有防正課該鹽政所請承借官票之處著不准行至蘆商疲敝亦係實在情形嗣後應交各款著照端華等所議准其五成交銀五成以制錢二千作銀一兩交納如此變通辦理恤商卽以裕課該鹽政務當督飭運司於該商等應完課款認真稽覈隨時提解毋得

任令各商藉口疲敝再有延誤○僧格林沁勝保奏逆匪自占踞連鎖堅壁死守臣等恐該逆潰竄先於西岸挑挖長濠尙未竣工該逆恐被圍困於二十二日夜復又占踞西岸村莊離所挖之濠甚近用礮擊打挖濠人夫所有業經擇定挖濠之處斷難工作止得另行擇地挑挖惟地方愈廣工竣更需時日連日督兵進攻並用礮轟擊斃賊百餘名數十名不等二十二日進攻賊巢侍衛綏闊奮勇爭先冒受槍傷是夜該逆由東岸撲出都統西凌阿帶領馬隊官兵將該逆殺退臣勝保見於二十三日帶馬隊官兵馳抵連鎖當卽由東面繞至東北與臣僧格林沁會晤察看情形北面與東北西北兩面均經臣僧格林沁搭橋挖濠修築礮臺妥爲布置南面與東南西南兩面官兵不敷分撥稍覺空虛臣擬卽於賊營南面紮營一面調集船隻支搭浮橋可以東西接應聲氣相通

如果賊匪窮極思竄卽當認真擊殺痛加剿洗 上諭軍機大臣等價格林沁勝保等奏連日進攻連鎖賊巢一摺所奏毫無把握逆匪起立木城分踞村莊如此容易我兵但知挑挖長濠又不能剋期蕆工及連日進攻殺賊不過百餘名數十名而我兵傷亡亦復不少似此曠日持久何時始能殲滅茲閱該大臣等奏報殊出情理之外賊於初九日夜間竄出占踞連鎖我兵緊接跟追何以遲至二十二日尙任該逆從容占踞西岸村莊且稱另行擇地挖濠是此十口之內所辦之工全歸無用儻逆匪愈占愈廣我兵濠塹亦將愈挖愈遠自來困賊有此下策否若濠塹果有可恃原不妨計日以待阜城覆轍已可概見尙復沾沾必出此策朕畀價格林沁以如此重任不料其束手無計一至於此朕實爲之深愧勝保已抵該處步隊亦卽日到齊自當力籌進攻與價格林沁和衷

速辦此股逆匪本係勝保專辦不得一味諉過於人前此寄諭業已詳示若勝保竟恃山東勦賊爲莫大之功於連鎮勦辦事宜輒視爲有人分任徒事遷延斷不能逃朕洞鑒前此所諭誘賊出巢設伏出奇等事能否遵辦卽著相機妥籌剋日奏功綢關胷受槍傷實屬奮勇著發去白玉四喜搬指一箇玉靶小刀一把大荷包一對小荷包四箇交該侍衛祇領所需火藥已諭巡防王大臣如數撥解矣將此由六百里加緊各諭令知之○丙申諭軍機大臣等官文等奏擊退攻撲荊州賊匪一摺此股逆匪由隨州棗陽直趨安陸荊門進逼荊郡經官文貴陞分派遊擊王國才協領功額訥等督兵由東北二路奮力迎擊連獲勝仗勦辦尙爲得手惟安陸荊門係荊州前路屏障何以任令逆蹤先後竄踞尙未據台湧奏報此時固以力保荊郡爲要仍須乘勝相機迎截爲前後扼剿

之計該將軍等務卽嚴飭帶兵員弁迅圖截殺使該逆無由乘虛
回竄方爲上策其逃散餘匪亦應加意搜捕免致蔓延勾結至潛
江監利一帶肆擾土匪旣據奏稱派委員弁分股進攻亟須激勵
兵勇次第殲滅庶荊州一郡不至腹背受敵而防剿均易於爲力
江路見尙阻隔湖南賊匪亦難保不旁竄勾結青磨坐守省垣恐
有不能兼顧之勢台湧籌剿北路賊匪見擬由應山進攻德安等
處所有荊郡一切勦辦機宜該將軍等務當隨時知照互爲策應
豈得以驛路阻塞爲詞遂不思設法疏通爲彼此援應之策耶另
片奏請截雷川餉以濟軍需卽照所議辦理其餘二萬五千兩仍
著趕緊委員繞道解赴台湧軍營應用毋稍延誤將此由六百里
加緊諭令知之○大學士裕誠等議覆戶部奏擬變通部庫放項
章程一凡關繫 壇 廟大典及外藩蒙古俸餉恩賞並貧民賑

卹各項應仍實發見銀一官員領項照俸銀折給制錢一串寶鈔一串一兵丁匠役領項照餉銀折給制錢二串一各衙門公費及折價等項發給銀票各半一工程等項減半發給一運腳盤費採買等項折給制錢二串一物料工價米折等項折給制錢一串五百以期均平畫一從之○丁酉諭內閣給事中張祥晉奏請將欠交房租補行徵足一摺前因軍餉浩繁於京師地面暫收房租原係一時權宜之計據該給事中奏稱數月以來租數減少請將欠交之租定限勒追等語所奏殊屬鄙瑣不惟無此政體轉恐別滋弊端且該給事中卽係巡城如果所屬地面官商民戶抗不交租當時何難覈實嚴查催令完交迨既經停止之後始奏請令八旗五城勒限補追徒增擾累有何裨益所請著不准行○諭軍機大臣等琦善奏官兵分路進攻各情並艇船將弁延玩等語本月二

十一日琦善分督官兵由東西兩岸進剿瓜州賊匪雖殲擒數百名或數十名而我軍將弁亦傷亡不少勦辦仍未能得手且西岸官兵設法攻撲之時該逆竟由鎮江突出賊船數十隻互相援應雖經開礮擊回江面仍毫無阻隔總由水師戰船未能得力之故琦善統帶水陸各軍葉常春等均歸節制如該革員等竟敢始終疲玩託詞延宕致誤事機卽當以軍法從事以肅戎行前調閱廣水師人員尙未到營著卽飛催啟程見在該大臣營中如有得力之員亦可暫行派令管帶俟紅單等船到時再行酌量派員更替至該匪以鎮江爲巢窟欲清江面必得於克復瓜州後以水師南擣鎮江與余萬清水陸夾攻若能克復鎮江則水師船隻可以直達金陵俟挖罟紅單等船到江事機不可失也其儀徵浦口等處均有逆船窺伺雖俱經擊退仍當加意嚴防扼其北竄毋得稍存

大意將此由六百里加緊諭令知之○以肅順爲工部左侍郎內

閣學
士透